

Uunga siunnersuut: Raajanut akitsuutit pillugit Inatsisartut inatsisaata allanngortinneqarneranik Inatsisartut inatsisaat nr. x, xXx 2013-imeersoq

Aningaasaqarnermut Nunamullu Namminermut Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

ILASSUTITUT ISUMALIUTISSIISUTAA

Siunnersuutip aappassaaneerneqarnissaanut saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Finn Karlsen, Siumut, siulittaasoq
Inatsisartunut ilaasortaq Gerhard Petersen, Atassut, siulittaasup tullia
Inatsisartunut ilaasortaq Evelyn Frederiksen, Siumut
Inatsisartunut ilaasortaq Jens Imanuelsen, Siumut
Inatsisartunut ilaasortaq Kalistat Lund, Inuit Ataqtigiit
Inatsisartunut ilaasortaq Hans Aronsen, Inuit Ataqtigiit
Inatsisartunut ilaasortaq Naaja Nathanielsen, Inuit Ataqtigiit

Ulloq 17. oktober 2013-imi aappassaaneerinerup kingorna siunnersuut ataatsimiititaliamit misissorneqarpoq.

Siunnersuutip Inatsisartunit aappassaaneerneqarnera

Inatsisissatut siunnersuutip inuussutissarsiortunut aningaasaqarnikkut kingunerisassai pillugit Naalakkersuisut aammalu Kalaallit Nunaanni Sulisitsisut Peqatigiiffiata oqariartuutaat sooq assigiinnginnersut paasinarsisinneqanngimmat aappassaaneerinerumi illuatungiliuttunit naam-magittaalliutigineqarpoq. Tamatuma kingorna immikkoortumik suliarinninneq unitsinneqarpoq siunnersuullu ataatsimiititaliamit suliareqqitassanngortinneqarluni.

Ataatsimiititaliap siunnersuummik suliarinninnera

Aningaasaqarnermut Nunamullu Namminermut Naalakkersuisup allagaanik ataatsimiititaliaq ulloq 31. oktober tigusaqarpoq. Allakkat inatsisissatut siunnersuummut matumunnga

aammalu qalerallit avataasiorluni aalisarnermi pisarineqartut akitsuutaat pillugu Inatsisartut inatsisaata allanngortinneqarneranik Inatsisartut inatsisissaattut siunnersuummut (UKA 2013/101) tunngapput. Naalakkersuisoq allakkamini allappoq:

”Sulisitsisut Peqatigiiffiata (GA) UKA 2013/103-p siullermeerlugu oqaluuserineqalinnginnerani naatsorsuutigisat AIS 2014-imut tunngavigineqartut assuarliuteqarfigai. GA-p Naalakkersuisullu akornanni kisitsisit assigiinngissutaat peqquteqarput, piumasaqaatit assigiingitsut tunngavigalugit naatsorsuinerit ingerlanneqarsimanerat. Naalakkersuisut naatsorsuinerat akitsuusiisarnermi annertussutsinut ilimagineqartutullu pisassiissutit, april 2013-imi ilisimaneqartut (imaappoq raajat akii), tunngavigitinneqarput. GA-p naatsorsuineri paasissutissanik juni/-juli 2103-imi ilisimaneqartunit ilimagineqartunillu tunngaveqarput. Piffissap qiteqqunnerani ilaatigut raajat akii annertuumik qaffaateqarput, amerlanerusunik iluanaaruteqarnermik kinguneqartumik. Tamanna inatsiseqartitsinernik atuutereersunik sunniteqaataavoq taamaattumillu UKA 2013/103-mi siunnersuummut toqqaannartumik attuumassuteqarani. ...

Oqaloqatigiinneq aningaasaqarnikkut kingunissat naliliivigineqarneranni inatsisissatullu siunnersuutip allannguuteqartinneqarnissaanut aappasaanik oqallisigineqarnissaanut isumaqatigiissutigineqarpoq.”

Siunnersuutip aappassaaneerineqarneranut Naalakkersuisut siunnersuummut matumunnga allannguutissatut siunnersuummik saqqummiussipput. Tassani siunnersuutigineqarpoq agguqatigiissillugu akiusooq 24,60 kr.-iuppat akitsuut 15 procentimit anginerulersinnaajunnaarlugu inissinneqassasoq siunnersuutigineqarpoq. Siunissami aningaasaqarnikkut atugassat pillugit inussutissarsiortunit isumakuluutigineqartut allannguutissatut siunnersuutikkut ilaatigut aaqqinneqartut Naalakkersuisut oqaatigaat. Tamanna pivoq akitsuutip qaffasinnerpaaffigisinaasaata 15 procentimut inissinneratigut.

6. Ataatsimiititaliap inassuteqaatai

Siuliani allassimasut tunngavigalugit siunnersuutip aningaasatigut kingunerisassai pillugit Naalakkersuisut GA-llu assigiinngitsumik oqariartuuteqarnerat paasinarsisinneqartutut isigineqarpoq.

Tamanna tunngavigalugu ataatsimiititaliap isumaqatigiittup Naalakkersuisut aappassaaneerinissamut allannguutissatut siunnersuut nassiussaat ilanngullugu siunnersuut Inatsisartunit akuerineqassasoq inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Finn Karlsen, siulittaasoq

Gerhardt Petersen

Evelyn Frederiksen

Jens Immanuelson

Naaja Nathanielsen

Hans Aronsen

Kalistat Lund